

«Soluziun optimala per la Rumantschia»

Las universitads da Turitg e Friburg collavuran

DA FLURIN ANDRY / ANR

■ Il quità ch'il chantun da Friburg chala cun la professura da rumantsch a sia universitad nun è stà motivà: Per il 1. da favrer 2014 tschertga quella ina professuressa u in professur per retorumsch. Tschertga l'Universitad da Friburg ina successura u successur per il professor da rumantsch *Georges Darms* u betg?, stuevan ins sa dumandar fin avant curt. Dapi paucs dis chattan ins dentant sin la pagina d'internet da l'Universitad da Friburg l'inserat per «ina professura associada per retorumsch a temp cumplain». Il candidat duai esser qualificà tranter auter era «per linguas minoritaras en scola e scolaziun» ed avair l'incumbensa «da cooperar en connex cun la fundamenta linguistica dal rumantsch era cun la Scol'auta pedagogica dal Grischun.» *Johannes Flury*, il rector da la SAP grischuna, explitgescha co che questa collavuraziun duai sa preschentar.

In center per retorumsch en plirs lieus

«Las universitads da Turitg e Friburg ston sa concordar in pau per ch'i na vegnia purschi dapertut il medem», declera il rector, «en l'inserat da l'Universitad da Friburg vesan ins che la litteratura rumantscha nun è en il center, mabain la scolaziun didactica dal rumantsch.» La litteratura vegn sco ch'el cuntinua tractada a fundplitost en l'Universitad da Turitg: «Cur ch'il professor *Clà Riatsch* vegn a demissionar en intgins onns vegnan ils responsabels da quest'universitad ad esser interes-



L'Universitad da Friburg vegn a porscher er en avegnir prelecziuns da rumantsch.

KEYSTONE

sads da chattar ina successura u in successur che metta vinavant l'accent sin la litteratura e cultura rumantscha.» Ina gruppa da lavur cun represchentants dals dus chantuns e las duas universitads sco era da las SAP grischuna, da Turitg e da Son

Gagl, ha prendi sut egl furmas pussaivlas da questa collavuraziun.

Professur u assistent per part er a Cuira

«Nus en la gruppa da lavur avain ditg

ch'insatgi che vul studegiar rumantsch stoppia viagià in zic, frequentar tschertas prelecziuns a Turitg, autras a Friburg», explitgescha *Johannes Flury*. Però er ils docents ston per part viagià, sco che quai è gia uss il cas: Clà

Riatsch è per part activ er a Friburg. Precis uschia è manegiada era la collavuraziun cun Friburg: «Quella persuna che vegn elegida sco successura da Darms a Friburg vegn ad esser activa, ella u ses assistent, parzialmain era qua en la SAP a Cuira», di il rector, «per dar prelecziuns u seminaris a nossa glieud qua.» Per questas prestaziuns surprinda il Grischun ina part da la paga dal professor, quant nun è anc betg sclerì. Uschia survegn l'Universitad da Friburg sustegn da l'unic chantun che dovra questa purschida, la professura da rumantsch. Enpli vegn ad esser questa professura associada tenor Flury er en stretg contact cun l'Institut per plurilinguitad da l'universitad en la Svizra franzosa. «L'avantatg per nus da la SAP grischuna è che nus survegnin in liom stretg en il mund universitari», menziuna *Johannes Flury*, «sut las cundiziuns actualas survegn la Rumantschia a mes avis ina soluziun propi optimala.» Er il president da la Lia Rumantscha *Duri Bezzola* bevenventa questa collavuraziun cun Friburg: «Uschia pon ins garantir vinavant ina scolaziun academica en rumantsch.» Quels contracts tranter ils dus chantuns Friburg, represchenta da la cussegliera governativa *Isabelle Chassot*, ed il Grischun, represchenta da ses collega *Martin Jäger*, sco era tranter l'Universitad da Friburg e la SAP dal Grischun vegnan explitgads e sutscrits ils 8 d'avrigl a Cuira. Chassot presidescha era la Conferenza federala dals directurs d'educaziun.